

Tesalonaika 1 adi letama pakanama

Pol na waikaiwama

¹ Taugu Pol, Saelas be Timoti uma letanama ka girugirumina taumi aitaugā Mamaitua na damma Tesalonaika meagaine ko miamiana ġaromie. Mamaitua Tamadama, be Bada Yesu Keriso taumi ġaroġaronama. Taudi adi raukiviverema be adi subama ġaromie e kena nonoġana.

Pol Mamaitua ewai kaiwena, Tesalonaika banegidima adi waisumaġama aubainama

² Tauma raġan matabuna ama moiragie isemima ka vato be Mamaitua ka waikaiwa kauena, ³ baninama waisumaġa e voiemi da ko noyanoyana, be wainuapaġo e voiemi da yaba matabudi ko voivoiedina. Be ami noġotama Bada Yesu Keriso ġarone koya boru be kowai raba nuetauna Bada na kaba verau munaġama aubainama.

⁴ Yau bana, tauma kē kataie da Mamaitua yai nuapaġoemi be ya vinemi da taumi tauna ġaroġaronama. ⁵ Baninama tauma vari verenama ġaromie kē rarau guguyena nam giuġa, ibewa da rewapani mate, be nuemima nopone Arua Babau ya riuemi da inam matabuna riukaua. Be tauma taumi mate nema tè mia bakona ama yawasanama, taumi koya kataiena, ⁶ be tauma be Bada ama yawasanama taumi koya ruvedi be nama kivimaiġa ko naġonaġona. Avedi da ami

piripirima dosinama, be yaḡoro Arua Babau ya voiemi da vari verenama ma nuaveremi koyai aninena. ⁷ Vutuna aubainama tauwai sumağā Masedoniama be Akaia nopone mataira veredima ġaromie a kitedi, be nama ta naḡonaḡona. ⁸ Be yodi Mamaitua na riuma taumie e dabedaberarana banaga matabudi ġarodie be dobu ġesaudie mate ta vaivaiena. Be deḡo deḡo ka naḡonaḡona, taumi ami waisumaḡama Mamaitua ġarone, taudi ta giuemai be ka vaivaiena. Be tauma nam aba taumi varimima taudi kama riuriuedina. ⁹ Taudīqā taumi ami yawasanama ta giugiuena da taumi nema tauma koyai aninemaina, be nema kokoitau rauduneedima koya gosedi, be Mamaitua riuriukauina be miamia nonoḡinama yodi kowai muriwatane be aubainama ko noyanoyana. ¹⁰ Be mate taudi ta giugiuna da taumi kowai raba nuetauna da Mamaitua Natunama marae be e verau munaḡana. Tauna vutuna Yesu, gurie be Mamaitua ya kawa midisuḡu mu-naḡena. Mamaitua na medima e veraverauna sibo ya kovoġidānq, be Yesu tauna vutuna ewai yawasanidana.

2

Pol Tesalonaika nopone ya noyana

¹ Yau bana, taumi koya kataiena da raḡanine tauma taumi mate tè miamiana, inam nam mi-anā kavakavana, ibewa da ama mianama banibibiridima. ² Muriġāda vari verenama ġaromie kē rauguguyena, tauma piripiri be wainuatoitoi dosinama Pilipi meagaine kē banavidina. Be

avedi da banaga toitoi patara nōgodie, mata-maie a raukani dawe be a kunukunuremaina, be yāgoro Mamaitua ya sagumai be vari verenama kè rauguguyena āromie. ³ Tauma kè rarauguguyana rāgānine, tauma nam kaiyovu ke giue bo nam aiyaba ke voia waigewa be kei kedadoka waigewemina.

⁴ Ibewa da tauma Mamaitua yai aninemai be ya vinemai da vari verenama ka rarauguguyena. Be tauma nam banaga nōgonairidie ke rauguguya gagabana. Ibewa da Mamaitua aniwai nuaverenama aubainama kè rarauguguyana, baninama tauna vutuna nopo taukitanama. ⁵ Mamaitua ya kataiena da tauma nam airāgan ke gwayemi bo ke giugiu rēgarēgāuna da mane sibo koya utemai. ⁶ Be mate tauma nam kawasāge kedanama ke wanewanena da taumi be banaga āsesaudima mate sibo koya kawa sāgemai, ibewa. ⁷ Tauma Keriso na apasolma. Vutuna aubainama tokare tenetenēginama aba āromie sibo kè pāgona, be tauma nam nama ke voiana, tauma inam maika tina, natunatunama e raberabedi be nam aiyaba na sedama ārodiye ima pāgopāgona. ⁸ Taumi nuamaima koya pāgona aubainama, tauma nam Mamaitua riunāga ke giuena āromie, ibewa da tauma kēi uta munāgēmai be aubaimima ka noyanoyana.

⁹ Yau bana, ko nōgoti da tauma kupi da suara Mamaitua riunama verenama rauguguyenama aubainama, be tauma tunimaima kè kwapu gratena, be nam kewai vadasāgāna da sibo kè tainuaboyemi. ¹⁰ Taumi matemie be Mamaitua matane tauma banaga babaumai, didimanimai

be nam aiyaba ke voia waigewana da taumi tauwai sumaḡa sibo koyai wavumai. ¹¹ Be ko noḡoti da tauma tenatenaḡaḡa kè rabemina, maika tauḡoma na sedama e raberabedina nama. ¹² Tauma kè raraу kuremi, kè riuwai nuasubesubemi be kè riu vavasaḡemina da taumi Mamaitua na sedama be na ḡoane nama ko miana, baninama tauna ya vinemina da taumi tokare na waiguyauma neneḡarine ko miana.

¹³ Be tauma yaḡoro Mamaitua kawai kaiwena, baninama taumi Mamaitua riunama ḡaromāie koya paḡo be koyai aninena. Taumi koya kataiena da inam nam banaga ḡoma adi giu, ibewa da inam Mamaitua na giuma. Be yodi inam giunama taumi aitaugā tauwai sumaḡa, nopomie e noyanoyana.

¹⁴ Be yau bana, taumi Mamaitua na damma Judia nopone koya ruvedina, baninama taumi piripiri ami banaga ḡomama ḡarodie koya banabanavidina, teneḡinama nama Mamaitua na damma Judia nopone taudi piripiri Jius ḡarodie a banavidina.

¹⁵ Jius banegidima taudi vutudi peroveta be Bada Yesu ai guridina, be tauma mate a raukivi gewegewemaina. Taudi Mamaitua ta tatai tuaḡai, be banaga matabudi tawai ḡaviedina. ¹⁶ Be raḡan matabuna taudi ta riuriu tuaḡaiemaina da tauma nam sibo vari verenama eteni ḡarodie kè raraу guguye da sibo a yawasana. Inam kedane taudi adi gewagewama ta tatai potopotodina. Vutuna aubainama Mamaitua ya medi be adi kovoḡama ya utedina.

*Pol Tesalonaika banegidima vakitedima ya
goena*

¹⁷⁻¹⁸ Yau bana, tubuē taumi raḡan ġaubonaḡa kè taugosemina. Be ama noḡote yaḡoro tauma taumi mate, be kè ḡoe kae be kè raraubu rubu guratana da sibo kè verauna ġaromie. Be mate taugu Pol è raraubu rubu guratana da sibo è vakitemina be Seitan ama kedama ya miditomna. ¹⁹ Yesu Keriso na kaba verauma raḡanine aiyaba Bada kai katai da tauma taunoya veremai? Tauma tokare taumi ami waisumāġa vutuna tauna kai kataienai. ²⁰ Baninama taumi inam ama noyama votanama, be taumie tauma tokare ka kawa saġemaina.

3

¹ Tauma varimima vaienama kèi raba rereḡa da ġaromiae nam teneteneġina, vutuna aubainama ama ogama kè taraġi da taumaġa Atensma kè miana ² be Timoti kè riu porena ġaromie. Timoti tauna turamaima, Mamaitua na taunoyama. Tauna Keriso varinama tauwai daberarinama, be kè riuporena ġaromie da ami waisumāġe e duġumi be koi rewapanana, ³ be ami waisumāġe e sagumi da nam aitau raurubue bo piripirie kwa beku. Mamaitua ya vinedana da tauda tokare piripiri tà banavidina. ⁴ Tauma taumi mate tè miamiana raḡanine, tauma raḡon patapatanama kè riuriuemina da tokare piripiri tà banavidina. Be yodi aba ta tubutubuġana taumi kaite koya kataienai.

⁵ Vutuna aubainama taugu è mia rereḡa be ġarogue nam teneteneġina, vutuna aubainama

Timoti è riuporena ġaromie da ami waisumaġama sibo ya kitana. Taugu nuaguma ya rovona, deġoda tauraurubu ima raurubumi be ami waisumaġe koma bekubeku. Deġoda nama i tubuġana, naumeki da tauma ama noyama inam k睇 yakarena, be inam noya kavakavanama.

Timoti Tesalonaika varidima ya verauġena

⁶ Be Timoti yodi ġaromiae ya tava munaġa be yai varimaina da ami waisumaġa be ami wainuapaġoma yaġoro e kenakena be ewai rewapanana. Tauna yai varimaina da taumi dokane k睇 vava kitemina yaġoro ma nuaveremi ko noġonoġotina, be yodi ko noġonoġota guratemaina da sibo k睇 vakita munaġemina. Be tauma mate ka noġonoġota guratemina da sibo k睇 vakita munaġemina. ⁷ Vutuna aubainama yau bana, avedi da tauma nuaboya be piripiri toitoi nopolie, be raġanine Timoti ami waisumaġama yai varimai be k睇 vaivaiena, tauma nuamaima ya subana. ⁸ Yodi anikitanama rewapanana k睇 paġona, baninama taumi ami waisumaġama Bada ġarone koya boru be ko midimidi bagibagina.

⁹ Vutuna aubainama tauma yodi Mamaitua kawai kaiwena, baninama taumie tauma Mamaitua matane kawai nuaverena. ¹⁰ Kupi da suara tauma ka moimoiragi guratana da taumi agunai ka kita munaġemina, be ami waisumaġe aba da ko marumaruabiena ka sagumina.

¹¹ Tauma ka moimoiragina da Tamadama Mamaitua be dà Badama Yesu keda sibo a vokaukaue be tauma k睇 verauna ġaromie. ¹² Be mate Bada Yesu ami wainuapaġoma sibo yai

morebi be ya daberarana banaga ġesaudima mate ġarodie, maika nema tauma kawai nuapaġoemina nama. ¹³ Be mate tauna nopomima sibo ya voiedi da ai rewapanan be taumi banaga babau-mima sibo koya tubuġana. Be Bada Yesu na banagama babaudima mate adi kaba verau mu-naġama raġanine, taumi nam wavu sibo ġaromie ya kena Tamadama Mamaitua matane.

4

Mamaitua na ġoanama ko miana

¹ Yau bana, tauma ka riuriuemina da nema sibo koya mia bako da Mamaitua koyai nuaverena. Tauma kaite kè kataiena da taumi nama ko miamiana, be yaġoro Bada Yesu isane kawai baġemina da inam yawasaninama ko kaiguratena. ² Abaġa Bada Yesu isane kewai katakataimina, vutudi ko noġotidina!

³ Mamaitua na ġoanama inam umanama: Taumi sibo banaga babaumima koya tubuġana. Nam koi soġa yababayababa ⁴ be mabimime ami waiwaivima ko naġidi be Mamaitua matane ami waiwaivima taudiġa ġarodie sibo koya mia kauana. ⁵ Be nam ko badara yababayababa eteni banegidima maika, taudi Mamaitua nam ti kataiena aubainama nama ta voivoiana.

⁶ Be turamma nam debane mui kwa pore, bo turamma na waivima aikedae taunaġa kuya banavina, nam noġota gewagewa kwa kote. Banaga aitauġa inam nama ta voivoiana, tokare Mamaitua e kovoġidina. Uma kauidima maiġone kè giuemi be nuemima kè boruna. ⁷ Mamaitua ya vinedana da tauda banaga babaudama sibo

tè miana, be nam sibo yawasana miremiredie tè miamia, avedi. ⁸Vutuna aubainama aitau da uma tarawatudima e riuntuatuāgaiedinā, tauna nam banaga ima riuriu tuağaiena, ibewa da Mamaitua e riuriu tuatuāgaiena, tauna vutuna Arua Babau e uteutemina.

⁹ Be wainuapaño aubainama tauma nam aba ke girumina, baninama Mamaitua kaite yaba matabuna yai kataimi ¹⁰be taumi tauwai sumāga Masedoniama kowai nuapañoedina. Be ka riuriu vavasağemina da inam kauinama ko kaiguratena. ¹¹Be taumi sibo koya mia genuana be koya rabē munağemina. Be nimemima sibo yai dagudaguna anisagumima aubainama, maika boni kè riuriu vavasağemina nama. ¹²Inam kauine banaga nam waiwaisumeğidi taudi ta kitemi be ta viviremina, be nam banagağā nimedima ko raberabe da ko tainuarağerağedina.

Bada na kaba verauma

¹³ Yau bana, tauma ka ġoegoena da taumi banaga guriguridima adi riukauama sibo koya kataiena. Inam rağanine taumi tokare nam koyai nuaboya be koya ġaba gurata, banaga nam waisumeğidi adi voiama maika, baninama taudi tokare nam marae ta naġo. ¹⁴Tauda tħawwī sumāgħana da Yesu Keriso gurie be ya midisugħu munağħana. Be mate tħawwī sumāgħana da aitauġħa Yesu Kerisoe a gurigurina taudi tokare Yesu mate, Mamaitua e verauġħa tenağħedina.

¹⁵ Bada na waikatakataie umanama ya riuna: Na kaba verauma rağanine tauda yawayawasanidama nam banaga guriguridima

tà doka sasaridi. ¹⁶ Bada na kaba verauma rağanine, Mamaitua bonanama dosine e riuna, be anea adi badama dosinama e yokona, da Mamaitua na bogigima e riuna. Inam rağanine Bada mara e gose be e yovona. Inam rağanine tauwai sumağā guriguridima ta midisuğu dokana, ¹⁷ yodibe tauda yawayawasanidama mate gunume tài rawateğeida be Bada tà verau bodena. Dabudine tauda Bada mate tài rawateğeida be tà mia nonoğana. ¹⁸ Vutuna aubainama uma giudie ami banagama ko riuwai nuasubesubedina.

5

¹ Yau bana, tauma nam tokare ǵaromie ka giruma be ka riuemi da aba rağandie uma kauidima ta tubuğā. ² Ibewa da taumi sibo koya katai kauena da Bada na kaba verauma inam banaga danedanenena nama kupie e tavatavana maika. ³ Yaba matabuna e kenakena nue-tauna rağanine, banaga ta riuna, “Yodi suba tè banavina, be yaba matabuna inam naumeki.” Inam rağanine ei rağantenağe da gewagewa tabu be tabu dobu matabuna ei verautatena. Maika waivi bogabogana nama kana tauma e surusuruna nama. Inam rağanine nam değō aniwai moisiri ima kenakenana.

⁴ Be yau bana, taumi nam tadiwanawanae koma miamiana da uma rağaninama sibo ya tainuababağimi, taudanedenene maika. ⁵ Taumi matabumi yana natunatunama, be tauda nam kupi bo tadiwanawana natunatuna. ⁶ Vutuna aubainama tauda nam sibo banaga kenekenedima tè ruvedi, ibewa da tauda sibo matadama

a kaya be noğota didimanidima debade sibo a kenana. ⁷ Be aitaugā da kenekedima taudi kupie ta kenakenana, be taudi aitaugā tegotego buedima taudi kupie ta tegotego buana. ⁸ Be tauda yana ġaroġaronama aubainama, tauda sibo noğota didimanidima debade sibo a kenana. Vutuna aubainama waisumaġa be wainuapaġo tài kade, be ami yawasanama Bada ya uteutemina koi kunuboboena. ⁹ Baninama Mamaitua ya vinedana da tauda nam na medie kovoġa sibo tè banavi, ibewa da dà Badama Yesu Kerisoe yawasana sibo tè paġona. ¹⁰ Tauna aubaidama ya gurina aubainama. Na kaba verauma raġanine, avedi da tauda gurigurida bo yawayawasanida, tauda matabuda tauna mate tà mia nonoġana. ¹¹ Vutuna aubainama Bada riune koi kawa duġu vivira be koi rewapanana, maika yodi ko voivoiena nama.

Pol na raukurama damonama

¹² Yau bana, aitaugā Bada na noyae tawai badana, taudi ko viviredina, baninama taudi ġaromie ta noyanoya guratana, be ta rarau kuremina. ¹³ Koi nuapaġo guratedi be ko vivira kauedina, baninama ta noyanoya guratana aubainama. Be ko kita da ami banagama mate subae sibo koya mia kauana.

¹⁴ Be yau bana, ka riuriu guratemina da aitaugā matagayagayawidima ko riuwai noğotidina, be aitaugā moġimoġigidima ko riu sagusagudina, be aitaugā adi waisumaġe ta vovo gwaġagwaġana ko sagudina. Be ami banagama mate ko voyaġota vivirana.

¹⁵ Be ko kita da nam aitau gewagewa, gewagewae ei maesi. Rağan matabuna ko raurubu da vereğə ami banagama ami banagama ġarodie ko voiedina, be banaga ġesaudima ġarodie mate.

¹⁶ Rağan matabuna koi nuaverena! ¹⁷ Ko moiragi nonoğana rağan matabuna! ¹⁸ Abağə ġaromie ta tubutubugana, rağan matabuna Mamaitua koi kaiwena! Inam vutuna Mamaitua na ġoanama taumi aitaüğə Yesu Keriso tauwai sumağenama ġaromie.

¹⁹ Arua Babau kai maika e karakaratina, nam koi tiriri gaba! ²⁰ Aitaüğə tawai perovetana, nam ko riuntuatuağıiedi, ²¹ be adi giuma matabuna ko raurubudi da ko kitana, inam riukaua bo ibewa. Veredima da ko ragaudina, ²² be gewegewedima da ko gosağana.

Pol na waikaiwa damonama

²³ Mamaitua tauna vutuna suba Badanama, tauma kawai bağana da tauna sibo ya kawa babaumina. Be mate kawai bağana da aruimima, nopomima be tubugimima nam wavu e pağō, naumeki da Yesu Keriso dà Badama na kaba yovo munağama rağaninama e tavana. ²⁴ Tauna patupatutunama ya vinemina da tokare nama e voiena.

²⁵ Yau bana, aubaimaima ko moiragina.

²⁶ Wainuapağoe ami banagama koi kaiwedina.

²⁷ Bada isane yà riuriu vavasağemina da uma letanama tauwai sumağə matabudi ġarodie ko sievina.

²⁸ Dà Badama Yesu Keriso na raukiviverema ġaromie e kenana.

**Vari Verenama
The New Testament in the Dawawa Language of
Papua New Guinea
Nupela Testamen long tokples Dawawa long Niugini**
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020

9b8bda32-db42-5be3-9d24-4e4a5d5f65b2